

PENGAJARAN DARIPADA  
**A L - N A B A '**



USTAZ MUSTAZAH BAHARI

## **Pengenalan**

Alhamdulillah, segala puji bagi Allah Tuhan yang Maha Pengasih lagi Maha Penyayang. Yang mencipta alam dengan sifat-sifat-Nya yang sempurna.

Selawat dan salam ke atas junjungan mulia Nabi Muhammad s.a.w yang membawa Rahmah ke seluruh alam.

Syukur kepada Allah s.w.t yang memberi nikmat peluang untuk memberi sokongan dan khidmat kepada Darul Tafsir, Masjid Alkhair bagi menjayakan projek penghasilan bahan-bahan tafsir dan tadabbur al-Quran.

Seterusnya ucapan terima kasih kepada kepimpinan Masjid Alkhair yang memberi peluang dan kepercayaan kepada penulis untuk berkongsi sedikit ilmu yang dikurniakan Allah bagi menjayakan projek ini.

Usaha kerdil ini bertujuan untuk mengajak kaum muslimin dan muslimat kepada tadabbur ayat-ayat al-Quran yang diturunkan khas untuk umat Muhammad s.a.w.

Ia berpenampilan ringkas untuk mudah memahami intipati yang ingin disampaikan kepada kita. Ia ibarat jambatan untuk meneroka tafsiran lanjut yang boleh didapati dari kitab-kitab tafsir yang ulung. Para pembaca yang ingin mengetahui lebih lanjut akan perincian ayat-ayat yang dibaca, boleh merujuk kepada pelbagai kitab tafsir yang sedia ada.

## **Metodologi**

Bagi memastikan usaha ini berpandukan tafsiran yang betul, penulis telah mengambil beberapa rujukan asas dari kitab-kitab tafsir yang berwibawa seperti, Tafsir Ibn Kathir, Tafsir al-Qurtubi, Aysar al-Tafasir dan yang lain-lain.

Dari sudut terjemahan pula, penulis merujuk kepada beberapa terjemahan secara fizikal dan online. Selanjutnya penulis melakukan olahan yang sesuai untuk memberikan maksud yang lebih mudah difahami menurut konteks bahasa Melayu.

Penulis tidak menghuraikan lebih lanjut ayat-ayat yang jelas dan *straightforward*. Memadai dengan membaca terjemahan untuk memahami maksud ayat. Jika terdapat keperluan untuk menghuraikan lebih lanjut maksud dari sesuatu perkataan atau ayat, ia diletak di bahagian nota kaki secara ringkas.

Usaha ini pasti tidak sempurna. Pasti ada banyak lagi panduan yang boleh dikongsi. Hanya yang diharapkan agar ia dapat menarik perhatian para pembaca untuk

mengetahui lebih lanjut apakah lagi ilmu-ilmu yang terkandung dalam tafsiran ayat-ayat al-Quran yang boleh dijadikan pedoman untuk diamalkan.

Akhir kalam, segala yang baik datang dari Allah, yang lemah dan serba kekurangan datang dari insan yang kerdil lagi hina ini. Semoga apa yang diusahakan mendapat Rahmat dan Redha Allah s.w.t.

Mustazah Bahari

Rabiulawal 1445.

## **Tadabbur Surah al-Naba'**

Surah Makkiyah, mengandungi 40 ayat

### **Kelebihan surah al-Naba'**

Secara umumnya, setiap surah dan ayat di dalam al-Quran merupakan mukjizat dari Allah s.w.t yang membawa kebaikan kepada manusia. Namun, terdapat beberapa surah dan ayat yang dikaitkan dengan kelebihan tertentu seperti surah al-Fatihah, ayat al-Kursi dan lain-lain lagi.

Bagi surah al-Naba' pula tiada kelebihan khusus yang diriwayatkan secara sahih mengenainya melainkan apa yang disabdakan oleh Nabi s.a.w apabila ditegur oleh Abu Bakar al-Siddiq r.a mengenai penampakan uban di kepala Baginda s.a.w. Lalu Nabi s.a.w bersabda, "Surah Hud, al-Waqi'ah, al-Mursalat, al-Naba' dan al-Takwir telah membuat rambutku beruban (kerana dahsyatnya khabar mengenai hal ehwal hari kiamat)." (H.R. al-Turmuzi)

### **Firman Allah:**

عَمَّ يَتَسَاءَلُونَ (١) عَنِ النَّبِيِّ الْعَظِيمِ (٢) الَّذِي هُمْ فِيهِ مُخْتَلِفُونَ (٣) كَلَّا سَيَعْلَمُونَ (٤) ثُمَّ كَلَّا سَيَعْلَمُونَ (٥)

1. Tentang apakah mereka saling bertanya? 2. Tentang berita yang besar.<sup>1</sup> 3. Yang mereka perselisihkan tentangnya. 4. Sekali-kali tidak<sup>2</sup>, kelak mereka akan mengetahui. 5. Kemudian sekali-kali tidak, kelak mereka akan mengetahui.<sup>3</sup>

### **Tadabbur Ayat**

Golongan yang mengingkari kebenaran tidak akan berhenti bertanya tentang keabsahan segala berita yang benar. Itulah sikap golongan yang ingkar. Berbeza dengan golongan yang beriman, mudah menerima kebenaran kerana kebenaran tidak memerlukan bukti yang mendalam untuk diterima oleh manusia yang berakal. Kerana urusan Tauhid dan syariat yang diturunkan kepada manusia bukanlah perkara baharu.

### **Aplikasi Ayat**

- ❖ Teruskan beramal dengan Ikhlas secara istiqamah untuk bekalan menenuhi Allah nanti di akhirat.

---

<sup>1</sup> Ada pendapat yang mengatakan berita besar itu adalah mengenai perutusan Nabi Muhammad s.a.w yang mereka ragu serta nafikan. Pendapat lain mengatakan ia terkait dengan kebenaran al-Quran diturunkan dari sisi Tuhan. Majoriti ulama tafsir berpendapat ia bermaksud hari kiamat.

<sup>2</sup> Penafian yang bermaksud menafikan keraguan golongan yang ingkar terhadap kebenaran al-Quran dan hari kiamat.

<sup>3</sup> Mengetahui akibat pendustaan mereka terhadap hari kiamat dan pertemuan dengan Allah kelak.

### **Firman Allah:**

أَلَمْ نَجْعَلِ الْأَرْضَ مِهَاداً (٦) وَالْجِبَالَ أَوْتَاداً (٧) وَخَلَقْنَاكُمْ أَزْوَاجاً (٨) وَجَعَلْنَا نَوْمَكُمْ سُبَاتاً (٩) وَجَعَلْنَا  
الَّيْلَ لِبَاساً (١٠) وَجَعَلْنَا النَّهَارَ مَعَاشاً (١١) وَبَنَيْنَا فَوْقَكُمْ سَبْعاً شِدَاداً (١٢) وَجَعَلْنَا سِرَاجاً وَهَاجِجاً  
(١٣) وَأَنْزَلْنَا مِنَ الْمُعْصِرَاتِ مَاءً ثَجَّاجاً (١٤) لِنُخْرِجَ بِهِ حَبّاً وَنَبَاتاً (١٥) وَجَنَّاتٍ أَلْفافاً (١٦)

6. Bukankah Kami telah menjadikan bumi itu sebagai hamparan? 7. Dan gunung-gunung sebagai pasaknya? 8. Dan Kami jadikan kamu berpasang-pasangan. 9. Dan Kami jadikan tidur kamu untuk berehat. 10. Dan Kami jadikan malam sebagai pakaian.<sup>4</sup> 11. Dan Kami jadikan siang untuk mencari (keperluan) kehidupan. 12. Dan Kami bangunkan di atas kamu tujuh lapisan (langit) yang kukuh. 13. Dan Kami jadikan pelita (matahari) yang amat terang. 14. Dan Kami turunkan dari awan air yang mencurah-curah. 15. Supaya Kami tumbuhkan dengan air itu biji-bijian dan tumbuh-tumbuhan. 16. Dan kebun-kebun yang lebat (pohon-pohonnya).

### **Tadabbur Ayat**

Kerana sifat kasih dan sayang Allah terhadap manusia, berulang kali ditunjukkan kepada mereka kekuasaan-Nya yang dilihat dan dirasai sendiri oleh mereka secara alami. Manusia yang berakal pasti tidak akan menolak hakikat kekuasaan Allah yang ada pada dirinya sendiri dan di seluruh alam ini. Justeru, dengan segala ciptaan Allah yang terdampar luas di hadapan mereka dapat membuatkan mereka akur dengan kebesaran dan kekuasaan Allah dengan sentiasa melakukan ketaatan dan berzikir memuji-Nya.

### **Aplikasi Ayat**

- ❖ Ucapkan tasbih dan zikir-zikir yang sesuai bagi memuji Allah apabila melihat tanda-tanda kebesaran dalam setiap ciptaan-Nya.

---

<sup>4</sup> Menurut Imam al-Razi, diumpamakan kegelapan malam dengan pakaian manusia untuk menunjukkan hikmah kesihatan dan keselesaan bagi manusia. Sepertimana pakaian berfungsi untuk menambah kecantikan dan menutup keaiban manusia, malam juga berfungsi sebagai memberi manfaat kesihatan dan kebaikan kepada manusia dan sekalian makhluk di bumi.

### **Firman Allah:**

إِنَّ يَوْمَ الْفُصْلِ كَانَ مِيقَاتًا (١٧) يَوْمَ يُنْفَخُ فِي الصُّورِ فَتَأْتُونَ أَفْوَاجًا (١٨) وَفُتِحَتِ السَّمَاءُ فَكَانَتْ أَبْوَابًا (١٩) وَسُيِّرَتِ الْجِبَالُ فَكَانَتْ سَرَابًا (٢٠) إِنَّ جَهَنَّمَ كَانَتْ مِرْصَادًا (٢١) لِلطَّاغِينَ مَابًا (٢٢) لَا يَبْنِينَ فِيهَا أَحْقَابًا (٢٣) لَا يَذُوقُونَ فِيهَا بَرْدًا وَلَا شَرَابًا (٢٤) إِلَّا حَمِيمًا وَعَسَافًا (٢٥) جَزَاءً وَفَاقًا (٢٦) إِنَّهُمْ كَانُوا لَا يَرْجُونَ حِسَابًا (٢٧) وَكَذَّبُوا بِآيَاتِنَا كِذَابًا (٢٨) وَكُلَّ شَيْءٍ أَحْصَيْنَاهُ كِتَابًا (٢٩) فَذُوقُوا فَلَنْ نَزِيدَكُمْ إِلَّا عَذَابًا (٣٠)

17. Sesungguhnya Hari Keputusan adalah suatu waktu yang ditetapkan. 18. Hari (kiamat) ditiup sangkakala, lalu kamu datang berkelompok-kelompok. 19. Dan dibukalah langit, maka terdapatlah beberapa pintu<sup>5</sup>. 20. Dan dijalkanlah<sup>6</sup> gunung-gunung, maka menjadilah ia seakan fatamorgana. 21. Sesungguhnya neraka Jahanam itu (padanya) ada tempat pengintai<sup>7</sup>. 22. (Ia menjadi) tempat kembali bagi orang-orang yang melampaui batas. 23. Mereka tinggal di dalamnya berabad-abad lamanya. 24. Mereka tidak merasakan kesejukan di dalamnya dan tidak (pula mendapat) minuman. 25. Melainkan air yang mendidih dan nanah. 26. (Sebagai) pembalasan yang setimpal. 27. Sesungguhnya mereka tidak takut kepada hari perhitungan. 28. Dan mereka mendustakan ayat-ayat Kami dengan sesungguhnya. 29. Dan segala sesuatu telah Kami catat dalam sebuah kitab<sup>8</sup>. 30. Maka rasakanlah, dan Kami sekali-kali tidak akan menambah untuk kamu selain azab.

### **Tadabbur Ayat**

Sesuai dengan sifat Adil bagi Allah, setelah ditunjukkan segala bukti kebesaran dan kekuasaan-Nya serta kebenaran berlakunya hari kiamat, manusia yang memilih untuk menolak segala kebenaran itu akan menghadapi akibat yang buruk sesudah kematian mereka. Apa yang mereka nafikan di dunia mengenai azab dan balasan buruk di akhirat jelas terpapar di hadapan mereka kelak ketika manusia dibawa ke tempat perhitungan. Sebarang penyesalan di sana tidak lagi berguna.

<sup>5</sup> Ada pendapat yang mengatakan bahawa pada hari kiamat, langit yang asalnya kukuh tidak terbelah atau retak, menjadi terbelah seperti pintu-pintu yang terbuka. Pendapat lain pula mengatakan terbukanya pintu-pintu langit pada hari kiamat kerana turunnya para malaikat untuk menguruskan hal ehwal manusia seperti yang diperintah Allah kepada mereka.

<sup>6</sup> Diangkat dan dicabut dari tempatnya ke udara sehingga berterbangan sehingga orang yang melihatnya akan menyangka itu hanyalah fatamorgana. (Zubdat al-Tafsir)

<sup>7</sup> Maksudnya, para malaikat yang ditugaskan untuk ahli neraka sentiasa mengintai dan memantau keadaan ahli neraka sehingga mereka tidak terlepas dari azabnya.

<sup>8</sup> Kitab catatan setiap amalan/perbuatan manusia

## Aplikasi Ayat

- ❖ Teruskan amal berpandukan ajaran Rasulullah s.a.w dan sentiasa berdoa agar diselamatkan dari api neraka.

## Firman Allah:

إِنَّ لِلْمُتَّقِينَ مَفَازًا (٣١) حَدَائِقَ وَأَعْنَابًا (٣٢) وَكَوَاعِبَ أَتْرَابًا (٣٣) وَكَأْسًا دِهَاقًا (٣٤) لَا يَسْمَعُونَ فِيهَا لُعْوًا وَلَا كِدَابًا (٣٥) جَزَاءً مِّن رَّبِّكَ عَطَاءً حِسَابًا (٣٦) رَبِّ السَّمَاوَاتِ وَالْأَرْضِ وَمَا بَيْنَهُمَا الرَّحْمَنُ لَا يَمْلِكُونَ مِنْهُ خِطَابًا (٣٧)

31. Sesungguhnya orang-orang yang bertakwa mendapat kemenangan. 32. (Mereka dikurniakan) kebun-kebun dan buah-buah anggur. 33. Dan gadis-gadis<sup>9</sup> remaja yang sebaya. 34. Dan gelas-gelas yang penuh (berisi minuman). 35. Mereka tidak mendengar di dalamnya (syurga) perkataan yang sia-sia dan tidak (pula perkataan) dusta. 36. Sebagai balasan dari Tuhanmu dengan pemberian yang cukup banyak. 37. Tuhan Yang memelihara langit dan bumi dan apa yang ada di antara keduanya, Yang Maha Pemurah, mereka tidak dapat berbicara dengan-Nya.<sup>10</sup>

## Tadabbur Ayat

Sebaliknya bagi manusia yang taat, Allah yang Maha Adil dan tidak memungkiri janji-Nya menyediakan ganjaran dan balasan yang terbaik bagi mereka yang pasti tidak akan mengecewakan mereka. Walaupun nikmat syurga mengkagumkan, manusia perlu juga merasa kawatir akan kesusahan yang bakal dihadapi pada hari kebangkitan. Hanya dengan Rahmat Allah manusia akan terselamat dari kesusahan di dunia dan akhirat.

## Aplikasi Ayat

- ❖ Cari asbab/jalan yang boleh mendapatkan Rahmat Allah seperti melakukan kebaikan yang berpandukan sunnah Rasulullah s.a.w.
- ❖ Amalkan sunnah-sunnah Nabi s.a.w walau kecil dan sedikit tetapi istiqamah untuk meraih Rahmat Allah s.w.t.

---

<sup>9</sup> Di kalangan bidadari

<sup>10</sup> Sekalian makhluk tidak diizinkan berbicara pada hari itu kerana segalanya telah ditetapkan oleh Allah Yang Maha Adil. Tiada siapa yang wajar berbicara mengenai siapakah yang perlu diazab atau diberi nikmat syurga kerana Allah sahaja yang berhak menentukannya menurut ilmu dan hikmah-Nya.

### **Firman Allah:**

يَوْمَ يَقُومُ الرُّوحُ وَالْمَلَائِكَةُ صَفًّا لَا يَتَكَلَّمُونَ إِلَّا مَنْ أُذِنَ لَهُ الرَّحْمَنُ وَقَالَ صَوَابًا (٣٨) ذَلِكَ الْيَوْمَ الْحَقُّ  
فَمَنْ شَاءَ اتَّخَذَ إِلَىٰ رَبِّهِ مَا بَابًا (٣٩) إِنَّا أَنْذَرْنَاكُمْ عَذَابًا قَرِيبًا يَوْمَ يَنْظُرُ الْمَرْءُ مَا قَدَّمَتْ يَدَاهُ وَيَقُولُ الْكَافِرُ  
يَا لَيْتَنِي كُنْتُ تُرَابًا (٤٠)

38. Pada hari (perhitungan)ji, al-Ruh<sup>11</sup> dan para malaikat berdiri bersaf-saf, mereka tidak berkata-kata kecuali siapa yang telah diberi izin kepadanya oleh Tuhan Yang Maha Pemurah, dan dia mengucapkan kata yang benar. 39. Itulah hari yang pasti terjadi, maka barang siapa yang menghendaki<sup>12</sup>, nescaya dia menempuh jalan kembali kepada Tuhannya<sup>13</sup>. 40. Sesungguhnya Kami telah memperingatkan kepada kamu (orang yang inkar) azab yang dekat<sup>14</sup>, (iaitu) pada hari manusia melihat apa yang telah diperbuat oleh kedua tangannya; dan orang kafir berkata, "Alangkah baiknya sekiranya aku dahulu adalah tanah."<sup>15</sup>

### **Tadabbur Ayat**

Keadaan hari pembalasan yang menakutkan semua seharusnya menjadi peringatan buat manusia untuk mempersiapkan bekal yang baik lagi sesuai menurut perintah Allah. Kerana di sana tiada siapa yang layak berbicara untuk meminta atau menolak apa yang telah diputuskan oleh Allah s.w.t. Jangan sampai menyesal dengan tindakan dan perbuatan di dunia yang merugikan diri di akhirat.

### **Aplikasi Ayat**

- ❖ Penuhi/isi buku catitan amalan kita dengan kebaikan dan ketaatan.
- ❖ Lazimi istighfar agar kesalahan-kesalahan yang dilakukan secara sedar atau tidak diampunkan oleh Allah s.w.t.

---

<sup>11</sup> Terdapat perbezaan pendapat mengenai maksud al-Ruh. Ada yang mengatakan ia adalah Malaikat Jibril, ada yang mengatakan ia adalah satu malaikat yang khusus diciptakan Allah. Imam Ibn Kathir pula berpendapat ia merujuk kepada manusia.

<sup>12</sup> Menghendaki jalan yang selamat yang direndhai Allah s.w.t.

<sup>13</sup> Dengan melakukan kebaikan dan ketaatan kepada Allah s.w.t.

<sup>14</sup> Bermaksud kematian yang dekat yang membawanya kepada azab di alam barzakh atau bermaksud segala kejahatan yang dilakukan di dunia bakal disaksikan dengan dekat sekali di hari perhitungan.

<sup>15</sup> Sebagai tanda kecewa, putus harapan dan penyesalan yang mendalam kerana tidak mengikut petunjuk di dunia dahulu.

والله أعلم

# ***Terima Kasih***

HARAP ARTIKEL INI DAPAT MEMBERI  
MANFAAT KEPADA ANDA

اللَّهُمَّ إِنِّي أَسْأَلُكَ عِلْمًا نَافِعًا، وَرِزْقًا طَيِّبًا، وَعَمَلًا مُتَقَبَّلًا

Ya Allah, aku memohon kepada-Mu ilmu yang bermanfaat,  
rezeki yang halal dan baik, serta amal yang diterima.



**TERIMA KASIH  
KERANA  
MENYUMBANG  
KEPADA PROJEK  
TAFSIR 30 JUZ INI.**

Sokongan anda amat dihargai

Follow us on:  darultafsir.ak

**DARUL TAFSIR AL-KHAIR**